



Llywodraeth Cymru
Welsh Government

Datblygu Fframwaith Ymgysylltu Democrataidd

Crynodeb

Dyma gyfle cyffrous i wneud lleoliad gwaith ar brosiect ar ran Llywodraeth Cymru. Mae nifer o interniaethau ar gael i weithio ar dystiolaeth i helpu i lywio'r gwaith o ddatblygu ymyriadau polisi. Bydd yr ymgeisydd llwyddiannus yn gweithio'n agos gyda swyddogion Llywodraeth Cymru a rhanddeiliaid i ymchwilio i rychwant amrywiol o allbynnau ymchwil, ac i'w datblygu, a bydd yn cefnogi Llywodraeth Cymru yn ei phroses ymchwil. Caiff yr ymgeisydd gyfle i roi ei sgiliau ymchwil ar waith mewn amgylchedd polisi, yn ogystal â meithrin ei sgiliau cyffredinol ymhellach, a gwella ei wybodaeth am ymchwil y tu allan i'r byd academiaidd.

Y sefydliad

Llywodraeth Cymru yw'r Llywodraeth ddatganoledig ar gyfer Cymru sy'n gyfrifol am yr economi, addysg, iechyd a'r GIG yng Nghymru, busnes, gwasanaethau cyhoeddus ac amgylchedd Cymru.

Yn benodol, bydd yr interniaeth wedi'i lleoli o fewn y gwasanaethau Gwybodaeth a Dadansoddi (KAS). Mae KAS yn casglu, dadansoddi a chyflwyno ymchwil a data ar gyfer llunwyr polisïau a'r cyhoedd yn unol â safonau proffesiynol. Maent yn cynnig tystiolaeth annibynnol i ddeall, datblygu, gweithredu, monitro a gwerthuso polisïau'r llywodraeth. Mae KAS hefyd yn cefnogi cydweithwyr polisi i ddatblygu, gweithredu a chyflawni polisïau.

Yr interniaeth

Bydd yr interniaeth yn gyfle cyffrous i weithio wrth galon Llywodraeth Cymru. Bydd gofyn gweithio'n agos gyda swyddogion polisi ac ymchwilwyr cymdeithasol a bydd cyfle hefyd i roi sgiliau ymchwil ar waith mewn amgylchedd polisi, datblygu sgiliau cyffredinol ymhellach (ee llunio adroddiadau neu roi cyflwyniadau), a gwella gwybodaeth am bolisïau. Bydd yr ymgeisydd llwyddiannus yn elwa ar gyfleoedd datblygu a gynigir yn ganolog gan Lywodraeth Cymru, a gall hyn gynnwys mentora, cysgodi, cefnogaeth gan gymheiriaid a hyfforddiant.

Bydd interniaid yn elwa ar y profiad o gydweithio'n agos â Llywodraeth Cymru:

- Meithrin gwell dealltwriaeth o'r byd y tu allan i'r byd academiaidd a chynyddu cyflogadwyedd, gan ddefnyddio eu gwybodaeth a'u sgiliau i gyfrannu at waith Llywodraeth Cymru.

- Gall cydweithwyr yr intern yn Llywodraeth Cymru gynnig goleuni pellach ar ei brosiect PhD a all gyfrannu at lwyddiant y thesis, yn ogystal â chyfleoedd rhwydweithio o fewn y maes polisi sy'n gysylltiedig â'r maes ymchwil
- Sgiliau a gwybodaeth trosglwyddadwy
- Sgiliau rheoli amser
- Sgiliau ysgrifennu adroddiadau

Y prosiect

Cefndir y prosiect

Mae'r tîm polisi etholiadau (Llywodraeth Cymru) yn gweithio i sicrhau bod cynifer â phosibl o bobl Cymru yn gallu cymryd rhan weithredol yn ein democratiaeth. I gynorthwyo'r gwaith hwn, rydym wedi:

- ymchwilio a pharatoi polisiâu sy'n nodi ac yn mynd i'r afael â'r hyn sy'n rhwystro pobl rhag cymryd rhan;
- newid deddfwriaeth i sicrhau bod gwybodaeth yn fwy hygyrch, lleihau'r hyn sy'n rhwystro pobl rhag cymryd rhan a chreu dulliau i annog mwy o amrywiaeth mewn cyrff etholedig;
- noddi gwaith gan Ganolfan Polisi Cyhoeddus Cymru i (1) nodi diwygiadau etholiadol a fyddai'n helpu i hybu ymgysylltu a (2) comisiynu prosiect ymchwil i ddiffinio, mesur a monitro 'iechyd democrataidd' mewn ffordd wrthrychol ac ystyrlon;
- rhoi cyllid grant i awdurdodau lleol a sefydliadau cymdeithas sifil, yn enwedig drwy'r Grant Ymgysylltu Democrataidd, i wneud gwaith arloesol.

Yn ddiweddar, yn benodol, fe wnaeth y tîm polisi etholiadau gomisiynu ymchwilwyr yn Is-adran Gwasanaethau Gwybodaeth a Dadansoddi Llywodraeth Cymru i gynnal gwerthusiad o'r Grant Ymgysylltu Democrataidd.

Tynnodd y gwaith ymchwil sylw at gyfyngiadau o ran mesur ymgysylltu democrataidd, ac argymhellodd y dylid datblygu fframwaith canlyniadau ar draws y sector i helpu i werthuso gwaith yn y maes hwn. I gynorthwyo'r gwaith hwn, cynhelir y prosiect ymchwil hwn fel cam cyntaf y gweithgarwch, a bydd yn canolbwyntio ar gasglu ac adolygu tystiolaeth i ddatblygu diffiniad o'r cysyniad 'niwlog' o ymgysylltu democrataidd ac i ganfod sut mae wedi cael ei fesur yn llwyddiannus gan eraill.

Mae'n debygol y bydd yr interniaeth yn cynnwys:

- Trafod â swyddogion polisi i ddeall y bylchau yn y dystiolaeth ac i ddatblygu cwestiynau ymchwil

- Adolygu'r dystiolaeth sydd ar gael gan Lywodraeth Cymru a thrwy ymchwil ehangach, gan gynnwys gwerthuso prosiectau/ymyriadau polisi, yn ogystal ag allbynnau ystadegol sydd â chysylltiadau â'r pwnc dan sylw.
- Archwilio'r mecanweithiau sydd wedi'u defnyddio gan eraill i fesur ymgysylltu democrataidd, ac asesu a ellid cymhwyso'r dulliau hyn yng Nghymru, gan gyfrannu at wella'r canlyniadau a geir o'r wybodaeth sydd ar gael yn ogystal â datblygu darlun cydlynol o'r materion a'r grwpiau yr effeithir arnynt.
- Potensial i gynnal ymchwil ansoddol â ffocws, ar raddfa fach, i archwilio profiadau cyllidwyr a rhanddeiliaid eraill o ran materion polisi, er mwyn darparu cyd-destun a dealltwriaeth ychwanegol i'r adolygiad llenyddiaeth.

Mae'n bwysig fod y dystiolaeth yn cael ei hystyried o ran ei pherthynas â Deddf Llesiant Cenedlaethau'r Dyfodol (Cymru) 2015, yn enwedig 'Cymru fwy cyfartal' a 'Cymru o gymunedau cydlynol'.

Canlyniadau disgwyliedig y prosiect:

- Adroddiad sy'n adolygu ac yn cyfodod y dystiolaeth bresennol, gan ganolbwyntio ar ddiffinio a mesur ymgysylltu democrataidd.
- Cyflwyno'r canfyddiadau i'r timau polisi perthnasol.
- Cyhoeddi adroddiad ymchwil ar wefan Llywodraeth Cymru.

Cyfrifoldebau a gofynion yr interniaeth

Bydd yr interniaeth yn para am gyfnod o hyd at dri mis. Disgwylir i fyfyrwyr llawn amser gamu'n ôl o'u PhD i ganolbwyntio ar yr interniaeth am ei gyfnod, yn unol â chanllawiau ESRC ([Canllaw Cyllido Ôl-raddedig ESRC tud. 27](#)). Anogir ceisiadau gan fyfyrwyr rhan-amser.

Rhagwelir y bydd yr ymgeisydd llwyddiannus yn gweithio mewn ffordd hybrid rhwng adref ac un o swyddfeydd Llywodraeth Cymru yn ystod ei interniaeth. Gall hyn newid yn ddibynnol ar bolisi Llywodraeth Cymru. Bydd unrhyw newidiadau i drefniadau gweithio yn cael eu trafod gydag ymgeiswyr llwyddiannus.

Bydd yr interniaeth yn para am gyfnod o 3 mis amser llawn neu'r hyn sy'n cyfateb yn rhan-amser. Ar gyfer myfyrwyr sydd wedi'u cofrestru yn rhan-amser, mae'r interniaeth hon ar gael yn rhan-amser dros gyfnod hwy (dim llai na thri diwrnod yr wythnos waith), i'w negodi rhwng Llywodraeth Cymru a'r ymgeisydd llwyddiannus. Os hoffech gael eich ystyried ar sail ran-amser, nodwch eich dewis oriau gwaith ar y ffurflen gais.

Manyleb myfyriwr

Rhaid bod gan y myfyriwr:

- Y gallu i gynnal trafodaethau â thimau polisi i ddeall eu hanghenion ac i gynnal ymchwil desg ar ffactorau perthnasol.
- Sgiliau cadarn o ran adolygu llenyddiaeth a gwerthuso tystiolaeth, gan gynnwys y gallu i gyfosod ystod eang o dystiolaeth.
- Y gallu i gynllunio a chynnal cyfweiliadau â rhanddeiliaid a dadansoddi data ansoddol.
- Y gallu i werthuso canfyddiadau ymchwil a'u cymhwyso i gyd-destun polisi Cymreig.
- Y gallu i lunio dogfennau cryno, wedi'u hysgrifennu'n dda, gan gyflwyno tystiolaeth gymhleth mewn fformat hygyrch.

Dyddiad dechrau'r interniaeth

Ionawr/Chwefror 2026 (yr union ddyddiad i'w drafod). Efallai y bydd rhywfaint o hyblygrwydd gan ddibynnu ar amgylchiadau'r unigolyn.

Cyllid a chostau

Gellir talu costau teithio rhesymol i fyfyrwyr nad ydynt fel arfer wedi'u lleoli yng Nghaerdydd. Dylai ceisiadau fod yn gyson â chanllawiau sgol Graddedigion Gwyddorau Cymdeithasol Cymru (YGGCC). Ni fydd ceisiadau gan fyfyrwyr sydd angen cyllid ychwanegol ar gyfer teithio a llety yn cael eu trin yn llai ffafriol. Os oes gennych unrhyw ymholiadau am hyn, cysylltwch â Katy Marrin Katy.Marrin001@llyw.cymru a Jo Coates Joanne.Coates@llyw.cymru.

Diogelwch

Mae gweithdrefnau fetio Llywodraeth Cymru (sy'n berthnasol i staff dros dro yn ogystal â staff parhaol) yn cynnwys cwblhau ffurflen gais Safon Ddiogelwch Safonol ar gyfer Personél (BPSS) a Holiadur Diogelwch ar gyfer y broses fetio.

Mae'r broses hon yn gofyn i'r ymgeisydd gyflwyno tri math gwreiddiol o ddogfen adnabod. Dylai un o'r rhain fod yn ddogfen â llun (pasbort, trwydded yrru newydd), dylai un ddogfen ddangos y cyfeiriad presennol, a gallai'r trydydd math fod yn fil cyfleustodau, tystysgrif geni, P45 neu P60.

Gofynion cenedligrwydd

Mae bod yn gymwys i gymryd rhan mewn prentisiaeth ar y cynllun hwn yn dibynnu ar gwrdd â rheolau cenedligrwydd y [Gwasanaeth Sifil](#). Gwnewch yn siŵr eich bod yn gymwys cyn gwneud cais. Ni all y rheini sydd ddim yn cwrdd â'r meini prawf cymhwysedd gymryd rhan mewn gwirfoddoli.

Ymholiadau

Dylid cyfeirio unrhyw ymholiadau ynglŷn â'r post neu'r broses ymgeisio i emma.wallace@llyw.cymru.

Hysbysiad preifatrwydd

<https://www.llyw.cymru/hysbysiad-preifatrwydd-llywodraeth-cymru>